

四庫全書

集部

欽定四庫全書

元文類卷十七

元 蘇天爵 編

表

賀正旦表

劉敏中

歷頒夏正大春秋一統之書禮謹漢儀受圖貢四方之  
賀歡均朝野慶洽天人中賀剛健體元寬仁育物董官  
常而敷聖訓炳如日月之臨恤民隱而降德音翕叶地  
天之泰至和斯應景福維新臣等夙被寵榮泰司端揆

無尺寸效仰裨財成輔相之功願億萬年永享伴與  
優游之樂

賀冊后表

楊文郁

聖德日新端齊家以身之本坤元位正備臨軒發冊之  
儀慶溢九重歡騰四表中賀受天成命遵祖詒謀謂王  
教攸基莫若人倫之重然治道之至庶資內治之勤昭  
法象於軒星崇聲明於椒掖以贊嚴宸之孝理以協  
太母之徽音臣等服在近司顒觀盛際道符義易占順

承載物之亨願擬堯封申富壽多男之祝

賀元旦表

姚登孫

寶厯晨開恩誕敷於朔紀瑤池春滿慶先輯於東朝日  
月清華神民閭懌中賀道符乾統躬啓皇圖懿範難名  
備聖人之全德仁規妙運濟天下於太寧壽並兩儀福  
延萬世臣等班聯文石職忝膠庠仰測卦爻喜三陽之  
通泰俯陳歌頌奉億載之怡愉

賀建儲表

姚登孫

坤元居上挾皇統於中天震器有歸衍孫謀於奕世神  
人闔懌河岳清寧中賀聖德難名徽音夙著心遊太極  
兩儀妙玄範之功身佑三朝九鼎重宗磐之勢適春宮  
之肇建知景命之永延臣等嘉與諸儒欣逢盛典日月  
啓重光之運幸囿照臨華嵩開萬壽之期惟塵歌頌

賀聖節表

李之紹

寶厯建元協重華之嘉運瑶光貫月開上聖之貞符盛  
德在秋昊天有命中賀聰明稽古孝友根心丕顯文謨

端拱巖廊之上達觀新邑適均道里之中揆震夙之昌  
辰卜豐穰於今歲璇璣肇紀玉斗儲祥臣等肅謹班聯  
遙瞻粹穆宣昭鴻業載賡七月之詩耆定武功願繼萬  
年之雅

賀聖節表

鄧文原

天開景運篤有道之曾孫電繞神樞受介福於王母觚  
稜瑞靄闔闔臚傳中賀誕紹鴻圖丕承駿命至仁育物  
得秋而萬寶成盛德在躬居所而衆星拱當立經陳紀

之始為施仁發政之規郊廟肇裡朝野胥樂臣等叨  
玉署目極璇霄廣文王有聲之詩載歌律呂衍殷宗無  
逸之壽虔祝華嵩

賀正旦表

盧亘

瑤圖星拱禮盛三元璇宇天臨懽同九有煥宸文於懿  
範洽聖孝於英猷中賀迪詰徽柔濬幾淵靖崇勲廟社  
消羣慝而佑顯謨決策宮闈定神器而凝景命妙用夙  
諧於坤載大明參懋於乾剛臣等久玷中書肅承內治

儀新鴻號深仁昭被於綿區嘉錫隆禧慈訓永光於汗  
簡

賀親祀太廟表

延祐七年

虞集

九重御極太平端拱於中天萬舞奏庭盛禮告成於清  
廟羣方胥贊百辟交孚

中賀

剛健日新聰明時憲祖有

功宗有德衍歷服之無疆車同軌書同文底烝民之作  
人衣冕華昭於日月笙鏞和協於神人崇億載之洪基舉  
累朝之曠典臣等忝司政府肅侍齋宮邊豆駿奔仰宣



室受釐之慶衣冠稱賀效華封祝聖之誠

賀親祀太廟表

天厯元年

鄧文原

寶厯在躬祇服祖宗之訓太宮修祀於昭禮樂之文海  
宇均安神人交暢中賀德崇恭讓道積寬仁艱難具察  
於民勞後戴密繇於天授慶雲就日護璽綬以歸來瑞  
雪宜年洗干戈而載戢圭衮會龍章之盛簫韶致鳳羽  
之儀臣等備立台衡依光宸極羣工述職贊文治之成  
功萬壽膺符受明裡之純嘏

賀聖節表

虞集

春回正月律和舞鳳之庭日浹芳甸瑞紀流虹之渚綈儀洊舉治象更新

中賀

盛德在躬至仁育物紫微華蓋

煥乎經緯之為章朱草醴泉妙與生成而合化天開壽域人樂熙辰臣等弱翰無功清光有赫對揚休命絲綸緝黼黻之文歌頌永年簡冊載衣裳之治

賀正旦表

虞集

陽春發育明新若日之方中正朔會同溥博如天之為

大顯承盛化協慶昕庭

中賀

神武成功至文備德綜萬

幾而益裕達四聰而弗遺禮樂從容建用維皇之極圖  
書宣朗緝熙於穆之純假郊廟以受釐率臣民而錫福  
臣等叨陪鼎鉉式贊鈞陶時和歲豐願保無疆之祚風  
淳俗美永歌有道之朝

賀正旦表

宋本

泰元神策天開六甲之端北斗帝車星值三朝之旦立

政伊始與時俱新

中賀

睿智有臨明哲作則萬機初振

熙鴻號於紀年九廟載安被龍光於宗黨誕啟用材之路式推澤物之仁臣等身際昌辰首班著位風行雷動賡歌殊愧於古初日升月恒善頌惟先於壽考

賀親祀南郊表

至順元年

謝端

四方于理事天致恭己之誠三年而郊卜日叶用辛之吉功成治定禮備樂和中賀端拱無為純一不二肇舉明禋之典載嚴升配之文大呂黃鍾音協雲門之奏鎮圭纁籍輝聯蒼璧之華祥風和氣之與游景星慶雲

之疊見穹宇集貺宗社蒙休臣等叨佐清朝欣觀熙事  
列園壇之八陛幸陪漢時以侍祠陳泰階之六符願舉  
兕觥而上壽

戔

賀正旦戔

瓜爾佳之奇

位拱少陽仗簇黃麾之曉氣暄太簇祥開青禁之春邦  
本益隆輿情胥慶中賀仰導聖訓參洪政機執中傳精  
一之心作貳毓元良之望重明繼照陰邪常遏於未形

九四在淵龍德克潛於己著茲履端之伊始宜介福之  
孔多某等素乏長材叨居端尹星輝海潤莫酬沾被之  
恩月恒日升第祝綿延之算

賀千秋牋

楊文郁

陽常居於大夏方收養毓之功震一索為長男載啓亨  
嘉之會慶鍾甲觀歡溢寰區

中賀

克哲克明允文允武

春坊翊善茂隆邦本之貞曉寢問安長奉天顏之喜茲  
臨彌月之節宜膺百順之祥臣等竊備詞官進趨庭賀

幸聞樂府奉重輝重潤之章請合輿情上俾熾俾昌之  
壽

賀千秋牋

袁桷

心依宸極前星耀於明堂卯為春門大電環於甲觀盛  
德集福和氣儲祥

中賀體

仁法元師古合道溫恭事帝

密輔相以生成問學積躬益緝熙而光大疇咨黃髮之  
彥庸佐青闈之規茂對誕辰宜膺純嘏某等肅瞻儲禁  
忝職詞林鶴駕陳儀喜承顏於兩殿鴻圖衍慶願介壽

於千秋

賀正旦牋

虞集

玉燭調元播陽春於萬物  
禕衣乘翟奉景福於一人  
懽

溢宮闈慶延宗社

中賀

柔嘉維則博厚無疆  
帝業中興

五色煉補天之石  
女功內治七襄成報  
日之章  
膺瑤冊

之穠華衍金支之奕葉  
茂迎蒼厯益介洪禧  
某等備位

外廷稱觴前殿二南風  
化歌闕睢正始之音  
萬年室家

樂既醉太平之運



箴

絅齋箴

鄧文原

元坦使君以絅名齋屬巴西鄧文原敷繹其義乃作箴  
曰

維古哲人德美內植揚休弗矜反躬藏密在易坤厚會  
章可貞明夷蒞衆用晦而明善欲淵潛志無銜飾辟諸  
謁襲身章之則彼夸毗者內視歛如迺崇澆偽以眩羣  
愚鼓鐘有聞屋漏滋愧爾車甚澤而人斯瘁繫南郭子

尚絅是遵匪曰隱几式坐書紳

慎獨箴

安熙

可尊者德可畏者天無處不有無時不然念慮之發必有其幾勿隱其隱勿微其微從事於斯是曰慎獨自此精之萬物並育豪髮有間天理弗存利欲紛拏厥心則昏於戲戒哉敬作此箴書諸座隅以警言其心

銘

簡儀銘

姚燧

舊儀昆崙六合外經緯縱橫天常表帶三辰內循黃  
赤道交其中四游頻仰鈞簫凡今改為皆析而異繇能  
疏明無窒於視四遊兩軸二極是當南軸攸杳下乃天  
常維北歌傾取軸架應鏤以百刻及時初正赤道上載  
周列經星三百六十五度奇贏地平安加立運所履錯  
勒干隅若十二子五環三旋四衡繫焉兩綴闕距隨揆  
留遷欲知出地究茲立運去極幾何即遊是問赤道重  
衡四弦末張上結北軸移景相望測日用一推星兼二

定距八宿兩候齊視巍巍其高莫莫其遙蕩蕩其大赫  
赫其昭步仞之間肆所賸攷明乎制器運掌有道法簡  
而中用密不窮歷校古陳未有侔功猗歟皇元發帝之  
蘊畀厥義和萬世其訓

仰儀銘

姚燧

不可形體莫天大也無競維人仰釜載也六尺為深廣  
自倍也兼深廣倍絜釜兌也振溉不洩繚以澮也正位  
辨方日子卦也橫縮度中平斜載也斜起南極平釜鑑

也小大必用入地畫也始周浸斷浸極外也極入地深四十太也北九十一赤道斷也列刻五十六時配也衡竿加卦巽坤內也以負縮竿子午對也末旋機杖窺納芥也上下懸直與鑲會也視日漏光何度在也暘谷朝賓夕餞昧也寒暑發斂驗進退也薄蝕終起鑒生殺也以避赫曦奪目害也南北之偏亦可概也極淺十七林邑界也深五十二鐵勒塞也淺赤道高人所載也夏短冬永猶少差也深故赤平冬晝晦也夏則不沒永短最

也二天之書曰渾蓋也一儀即揆何不悖也以指為告  
無煩喙也闇資以明疑者沛也智者是之膠者怪也過  
者巧厯不億輩也非讓不為思不逮也將窺天朕造物  
愛也其有俟然昭聖代也泰山礪兮河如帶也黃金不  
磨悠久賴也鬼神禁訶庶勿壞也

漏刻鐘銘

姚燧

靈臺設簏巍以尊元間大呂非其鼎摯曠善鼓手自  
煩宮商良諧等釜盆請無以聲以功論一日之中兩昕

昏一鳴一刻有度存九圍一圃折柳樊黔首時作時養  
食日月如是相告敦三辰聽命循軌垣四序不忒迭寒  
暄萬物生翕盈乾坤何獨治厯道此源凝熙帝績高義  
軒積世而運會而元吉金之舌慎莫捫輟響誰其代天  
言

渾象銘

楊桓

於昭聖皇德惟天希密察乾坤動符化機乃命太史考  
順求違制器象天具體而微度數綦布星次珠輝道分

黃赤擬議玄規兩極低昂中主璇璣圖方象地極樞以  
維地本天函術取外圍反而觀之其趣同歸體雖至約用  
足明大象設目前人居天外觀天之裏合象之背日月  
交錯五行進退造化無窮不出戶內始終參求簡儀是  
配於昭聖皇夙夜睿思先天天合後天奉時先後惟天  
聖皇無為

玲瓏儀銘

楊桓

天體圓穹三辰在中星雖紀度天實無窮天度之數環



周三百六十五度四分度一因星之步推日而得月次  
十二往來盈虧五星參差進退有期判為寒暑分為四  
時太史司天咸用周知制諸法象各有攸司萃於用者  
玲瓏其儀十萬餘目經緯均布與天同體協規應矩徧  
體虛明中外宣露玄象森羅莫計其數宿離有次去極  
有度人由中闕目即而喻先哲實繁茲制猶未逮我皇  
元其作始備實因於理匪鑿於智於萬斯年寶之無墜

高表銘

楊桓

聖人修政惟農是本農之所見時則為準過與不及民  
安究之動措由中聖人授之時在於天術何以得制器  
求之乃見天則日月周運閏餘歲成盈虛消息在表斯  
徵分至既辨氣序乃會朔晦一定弦望由對爰演新厯  
用詔民時百工允治庶績用熙表中以正圭平以直不  
言而喻與時偕極天德芒芒參以明焉民生皞皞振以  
興焉惟昔八尺景促分密為用雖可每艱辨折聖皇御  
極百度維新乃五其昔其用益神表高之法先哲匪憚

其巔景虛取的是患表梁上陳景符下依符竅得梁景  
辰精微揆月有方闕几是映几限容光圭表交應器術  
之密推步之精歷古於今斯畢其能上天之載無聲無  
臭聖皇儀型在其左右仁民育物以對天祐眉壽萬年  
寶茲悠久

太史院銘

楊桓

天厭下土之亂眷求聖哲以作民主太祖聖武皇帝應  
運挺生以神武戡除禍難遂定皇元之寶命累聖肖德

增功績烈逮今憲天述道仁文義武大光孝皇帝稟資  
聖神自潛藩邸躬率師旅有征無戰天心人心攸屬攸  
係及位中國大建都邑任賢使能分設百官政教既行  
乃制禮作樂廟享祖宗仍遣將帥四征未臣始統一六  
合周臨天際端居無為飛潛動植仁惠普霑民既無事  
唯夫耕女織工器商貨自勞衣食聖慮周悉凡厚民生  
者無不為之以農事為四民衣食之本既設有司以董  
其勤又思為振舉之務乃立太史院以講明天道敬授

民時焉至元十三年上以循用大明厯久而失當欲叛其制以太子贊善臣王恂業精算術凡日月盈縮遲疾五星進退見伏昏曉中星以應四時者悉付其推行尋遷太史令以都水監臣郭守敬穎悟天運妙於制度凡儀象表漏考日時步星躔者悉付規矩之尋授同知太史事厯成遷太史令以前中書左丞臣許衡為命世之賢凡研究天道斟酌損益者悉付教領之輔以集賢學士臣楊恭愷其提絜綱維始終弼成者實前中書左丞

轉大司農臣張文謙尋以昭文館大學士領太史院事  
凡工役土木金石悉付行工部尚書兼少府監臣段貞  
以經度之凡儀象表漏文飾匠制之美者悉付大司徒  
臣阿納噶十六年春擇美地得都邑東墉下始治後垣  
縱二百布武橫減四之一中起靈臺餘七丈為層三中  
下皆周以廡其下面日中室為官府以總聽院政長曰  
令次同知院事次僉院事以宰輔之重領於上者無定  
員其屬有主事有令譯史有幹事有庫局之司左右旁

室以會司屬議凡推測星厯諸生七十人蒞以二局一  
曰推算其官有五官正有保章正有副有掌厯分集於  
朝室二曰測驗其官有靈臺郎有監候有副三曰漏刻  
其官有絮壺正有司辰郎分集於夕室凡器用出納於  
陰室中層離室以列景曜巽室以措水運渾天壺漏坤  
室以措渾天象蓋天圖震兌二室以圖南北異方渾天  
蓋天之隱見坎室以位太歲乾室以貯天文測驗書良  
室以貯古今推算厯法臺顛設簡仰二儀正方案專簡

儀下靈臺之左別為小臺際葺周廡以華四外上措玲瓏渾儀靈臺之右立高表表前為堂表北甬石圭圭面刻度景丈尺寸分圭旁夾以連葺可圭上露天日為度景計靈臺之前東西隅置印厯工作局次南神厨算學設位如上初改厯之議既行即遣官四遠測景以相參驗若高麗瓊崖成都和林葢擬義和仲叔之命又自上都南五千里中若東平陽城鄂吉等州各遣官測驗以求遠近之數十七年冬至以新厯進遷官賞賚有差十



八年頒行之十九年以祕書少監臣趙秉溫遷昭文館學士知太史院事明年啟皇太子旨以諭德臣李謙撰歷議二十一年以左侍儀奉御臣諤爾根薩里遷集賢學士尋遷大學士並兼太史院事遂以二十三年春同進歷經屬共二十一卷仍以餘事未成者奏以臣桓與其議若歷經歷式等序若表漏儀象等銘臣桓既冒言矣又拜手稽首原立院之初序而銘曰

天鑑下民亂靡有定孰能一之聖哲受命太祖神武始

開乾坤勦業垂法以貽後昆續緒紹功剷除妖昏逮今  
聖皇天錫勇智內修法度外遣將帥伐罪弔民罔越厥  
志炎方歸命赦其後至武功告成萬國來萃同軌同文  
重譯奉贄小大悉臣師旅以寧思與萬方永保太平黎  
民定居蕃息生生為衣而蠶為食而耕士勸其賢工勸  
其能闕阨夜開商旅通行民惟勤克罔適天宜匡之翼  
之以煩聖思乃立太史法遵黎義欽若天道敬授民時  
教其動作時種時穫教其趨向是宜是吉五禮之舉選

時為日代卜代筮不勞龜策期措斯民康壽之域民祝  
聖皇眉壽萬年民祝聖皇五福駢臻民祝聖皇億兆子  
孫七政順軌陰陽調均時雨時暘化育秋春蕩蕩巍巍  
順德何言天覆地載太平無垠

瓶城齋銘

為淮東憲司知  
事凌德庸作

閻復

利慾之兵或隳吾城躁厲之機或發吾瓶墨其守不若  
修仁義之干櫓金其緘不若駕聖賢之說鈴若然則城  
何懼於脫扃瓶何患乎建瓴哉

王孝女旌門銘

劉因

女家容城西以母喪感念遂不嫁終身州上其行御史  
按實禮部令旌表之內翰盧公署其門曰孝女王氏縣  
人劉因銘曰

孰不娶終身曰魯山之元道州之陽史名卓行何謂非  
平常二子且然女奚責望盧公表之何用以戒荒

訥齋銘

吳澂

君子之訥不盡其有餘小人之訥將言而囁嚅得善敏

於行近仁者歟是為君子儒非小人儒

蘇氏藏書室銘

袁桷

六學鴻烈代天昭明精思纂微辭以立誠匪事於言不言奚宣析理日繁直致衍傳謂默足以通絕其知聞敬焉孰持道焉孰存趙郡氏蘇崇其書楹剖決雲章經緯有程靈根湛虛服習粹精廣以觀萬約以守一迎之莫尋倚兮不躋仰止元聖學海彌溢

虛室銘

虞集

天地萬物寓形太虛何有非實虛則俱無有室非虛何  
名虛室室有毀成而虛無成無受毀質室之在虛無不  
加廓有不加室善居室者反同於虛萬古一息

奎章閣銘

虞集

天厯二年四月吉日天子作奎章閣萬機之暇觀書怡  
神則恒御焉臣等奉敕刻銘曰

維皇穆清中正無為翼翼其欽聖性日熙迺闢延閣  
左圖右史匪資燕娛稽古之理經緯有文如日行天爰

刻貞王垂美萬年

知許州劉侯民愛銘

富珠哩

至大元年秋奉直大夫許守劉侯既終更矣郡縉紳先生田浦城劉興國及舊家望族郡人之父兄長者謀劉侯字民之政於石屬筆小子忝懇讓不獲敢蹟侯行事譔次之大德龍集乙巳夏六月侯下車家政斬然聞無雜謁其在猷為苟有利民無或不舉許北趾於汴南揖淮楚素號多事侯材識精敏百務叢劇聲容舒徐刃迎

而節解吏無稽牘獄無柅訟不尚苛猛而凜不可犯自  
公而優入則杜門端晏游永典籍出則賓禮先覺隆獎  
學校三時既隙則帥郡屬叩校官請益經史親為之倡  
繇是郡政翕然侯澤物仁而有方耕鑿樹畜求底實效  
及終三年諸軍數牧外丘陵原隰墾闢殆盡初郊農貿  
穀市僧連郡豪徼糴外關擅輕重以售嫗弱胥困乃立  
斗斛市距州治重脅糴翔價之法趨者如歸糴雖升合  
以上無敢摧劓民農兩利之侯以事出法漸弛復襲舊



至杖大馭數人法復立民頌歌之歲丙午河南諸郡饑  
流瘠日至春穀價勃湧首發私庾大縮價聽民糴募富  
民粟數萬斛出糶市慮糴有不均也於諸社責其長日  
閱數賦與之夏雨戕麥得請出郡廩積年鼠耗鑿米薄  
價紓民春夏徂秋無凋瘵者明年荐饑羸享狼戾請省  
出公緡賑之民為蘇中統抵大德凡所立有司法程討  
閱簿書彙帙度置而據守不跲故勇於拯民而善禦其  
害省大核屯田臨潁鄧艾口民稻田三百頃人有說省

曰此古屯也可復築之下侯按實之侯按至元中司農  
研水利拓民業隆平生息之道也業此皆三四十年的暴  
取之民措何地省不韙以兵民恫疾之狀迭陳不可卒  
止宣徽歲遣使征羊馬法三十取一至則肆虐取人莫  
誰何度其至今縣民大書其法於堊壁惠遂止程約五  
縣絲賦齊均凡出錢縣官市物民間曰和買民產所有  
猶未易供無之則估百倍賦官郡縣苦督責無敢拒貪  
肆者亦陰幸漁獵雖瘡痍其民不恤侯深患之土有均

賦之苟無之抗簡覆陳不允不止鄢陵扶溝產紅藍猝  
不時買萬鉅時其地年歉而藍霧民大驚蹙省以侯敏  
幹略趣買之相其故力請罷之是不獨仁於許又有以  
仁其鄰也省檄論囚荆而時荆楚大水民饑歸請撤禁  
山澤以活危墊省移中書如請民濟於阨是其澤不獨  
囿於近又有以及其遠也其聽訟明察而果哀矜惻怛  
未始不行其間襄城南距湛河與葉交壤葉民之鹽取  
解池齊鹽止襄舊樹石河之南塹鑿以畫鹽之法葉令

妄徙而北侵襄民近百家嗾漕屬以其法酷弃之兩縣  
飛狀鬪辯葉引陝漕合攻襄中以危法時侯偕省使者  
會決之卒以理推葉復石舊疆民底寧河南先民疎土  
曠田價至弱雖有質鬻而契券濶畧鹵莽逮今民日生  
集叢蓁灌莽盡化膏沃價倍十百鬪鬪滋熾秦吏蠹法  
孔穴焚出至有綿曠歲時而莫之決者侯既清白復詳  
聽覽而洞情為佑是懲非至未半歲決以百數訟為哀  
民葛英女嫁而奔人英蹟之獲他婦憚嚴其舅姑而私

竄外者寘家令妻教壻族事如其女返魂他屍者歸壻  
不納一男子果爭之訟不決侯行縣詰之情立出民有  
以計誣置其同行者訟縣醉亡楮緡千獄建人數十訊  
不白屢愬州至據地以慟覘色詐立屈之決囚南陽主  
婦告奴酖其夫三日死榜楚極惜毒獄久不立侯讞曰  
實有毒立死無少緩者簡孚獄供有寃立宥之其聽決  
多此類也舊水旱禱祠桑門羽流雜巫覡囁無益一  
不取齊袂精壹以走羣望靈貺昭答嘗春旱禱八龍井

明日雨大作民有擁香拜舞治所者人既德侯侯善使人而不知所務長社尉解僻遠為創築近郡治使與庫傳狴犴相連峙徼循捍衛弭患無形三皇肇立民極今天下通祠而舊郡祠陋不構新之崇葺廟學植檜柏六十本築室藏書購塑工體先賢貌影自濂溪及紫陽朱子像而祠於學故實凡相交承則帥宋屬厚贐禮去者於侯又最豐終讓却之始終銖髮無取及是人益信在政曄曄岳牧風紀屢倚重之軋強鋤暴在人所不敢為

侯不憚也將退政之日其下讐伏如甫至談者偉異之  
名聲籍籍上游諸公多譽籍之交剡騰薦不一二數士  
論稱奉法恤民有古良二千石之風知言者是之侯名  
天孚字裕民家大名以國書生從事中書出判東平移  
漕司擢知冠州遂遷許風岸蘄立氣度凝遠春秋方強  
據用未既加忠孝愷悌出天稟能以學濟之淵乎莫測  
也浦城名九疇興國名庭瑞皆仕焉而已者聲實素著  
郡人望所推先郡既不忍弭忘侯德兩公倡率之人彌

咨嘆其公云邠既敘其詳乃撮而詩之庸翼郡人寥邈之思辭曰

郡侯繩繩三歲逆旅孰莫我矜侯我父母我饑以寒燠我舖我鳴柚於家田墾在野繫我窘躋均痼其身膏以雨澤煦吾陽春惟古立學定民之命治有本末禮樂刑政誰蔑棄之謂能其官我侯至止德馨如蘭士蒙顒顒侯教載之縉紳煌煌侯勞來之孰匪人哉而玩侯法將難芟之我用是憇善達而施天下之兼寧獨我私一郡



是淹車聲麟麟民莫侯攬有堅其礪鑄配琬琰鼎鼎其  
來疇允侯蹟跂予望之其永無極

安氏尊經堂銘

富珠哩卅

明明尊經安氏堂之用有儆惕予其銘之於在古昔挺  
起神聖越紹上帝昭我明命暨蒼姬氏四術迺崇詩書  
禮樂順古範銘文武道衰四教崩弛孰其掾之天縱夫  
子龍馬獻圖用著著策吉凶悔吝開我人則二禪三繼  
曰帝曰王典謨訓誥明我天常志欲有言形於詠歌雅


頌得所神人以和王綱失維列侯遞霸其敢僭踰筆討  
無赦是謂四府其用不窮大禮大樂升降污隆宇宙有  
經終古莫忒民無能名功載人極鼎鼎儒者相與守之  
孰吾堯桀相與陪之曾子思孟荀董王韓周程張朱以  
達聖元不息不泯皇衷民彛其有能奮立百世師安氏  
東垣世以儒名味道之醇服義之精百氏謏聞寧不有  
當處宜下陳經無二上至小無內至大無外晦不加蹙  
顯不加泰風雨震凌併蒙是屋六籍鳳峙疇非雌伏安

父之嗣伯仲叔季穉子齒孫繩繩繼繼豈徒藏之斯務  
明之豈徒尊之斯務勤之其徒之賢蘓伯修甫將以所  
聞往相告語多岐亡羊克敬克念無或怠墮請以銘鑑

儼思齋銘

楊剛中

理究斯明為殊為同學求斯詳疇初疇終匪心斯圖何  
彰弗蒙既端爾容既肅爾躬冥凝虛遊視遺聽空思而  
以斯無微不通跛倚踞敬必弛於中矯笑躁言必隨需  
功戒哉無忘惟道之融



元文類卷十七

欽定四庫全書

集部

元文類卷十八

詳校官通政使

臣 夢吉

助教

臣 常循覆勘

總校官庶吉士

臣 朱 鈐

校對官中書

臣

嵇承志

謄錄監生

臣

劉大耀

欽定四庫全書

元文類卷十八

元 蘇天爵 編

頌

賈侯修廟學頌

吳 澂

世祖皇帝既一天下作京城於大興府之北其祖社朝  
市之位經緯塗軌之制宏規遠謀前代所未有也至元  
二十四年設國子監命立孔子廟暨順德忠獻王哈喇  
哈遜相成宗始克繼先志成其事而工部郎中賈侯董

其後廟在東北緯塗之南北東經塗之東殿四阿崇十有七仞南北五尋東西十筵者三左右翼之廣亦如之衡達於兩廡兩廡自北而南七十步中門崇九仞有四尺修半之廣十有一步門東門南之廡各廣五十有二步外門左右為齋宿之室以間計各十有五神厨神庫南直殿之左右翼以間計各七殿而廡廡而門外至於外門內至於厨庫凡四百七十有八楹肇謨於大德三年之春訖功於大德十年之秋於時設官教國子已二



十年矣寄寓官舍不正其名丞相以為未稱興崇文教之實也乃營國學於廟之西中之堂為監前以公聚後以燕處旁有東西夾夾之東西各一堂以居博士東堂之東西堂之西有室東室之東西室之西有庫庫之前為六館東西嚮以居弟子員一館七室助教居中以蒞之館南而東而西為兩塾以屬於門屋四周通百間踰年而成不獨聖師之宮巍然為天下之極而首善之學亦偉然聳天下之望遠邇來觀靡不驚駭嘆羨其高壯

宏敞蓋微丞相其孰能贊承聖天子之德意而微賈侯亦孰能闡張賢宰相之盛心哉侯之董役也晨夕督視不避風雨寒暑措置分畫一一心計指授工師莫能違焉陞本部侍郎又陞本部尚書出領他處營造事身雖在外心未能忘廟學也至大二年還朝拜戶部尚書首詣廟學環匝顧瞻如其家然嗚呼世之居官者大率簿書期會刀筆筐篋是務知政治之有原名教之可宗者幾何人哉人咸以為迂而侯拳拳汲汲惟恐或後蓋其

資識卓矣侯少時為憲府屬憲長誣其副柄國者仇正直欲置之死數十人皆將連坐證左迫於拷掠悉附和以成其誣侯與在數中獨守正不阿徇淹繫三載卒不變移受誣者藉是得脫自戶部尚書而參議省事也會有羅織之獄侯議詳讞大忤時宰幾與同罪賴救解以免嗚呼侯之為人如此宜其於聖道儒術深有契也非資識之過人而能之乎侯每以范文正期國學諸生激聞而愧輒面赤汗下夫文正之為文正無他亦曰先天

下之憂而憂後天下之樂而樂耳嗚呼安得人人不負  
侯之所期者哉侯名馴字致道濟南鄒平人將歸其鄉  
故著侯之所以有績於廟學者為頌至大四年三月朔  
國子監丞吳激敘詩曰

詩十章章四句

於赫皇元澤彌八埏翼翼京師風化攸先  
孔道曷明千古日月帝曰廟之以對光烈  
顯允龐臣欽輔神孫祖訓是承往聖是遵

相謂而馴而職而職乃基乃構乃墁乃甃  
侯祗相言弗懈以虔新宮巍巍有倬其騫  
宮牆之西學官爰作我宏爾居爾懋爾學  
爾士來游四方具瞻爾則匪遙像貌肅嚴  
恂恂賈侯克敦克敏孰挫其蘆孰混其畛  
一正不阿百折不回族斯糾紛剗之恢恢  
廟貌之崇天子之德丞相之功賈侯之力

青宮受寶頌

虞集

天曆二年六月己酉皇太子受寶於行幄臣等拜手稽首而言曰臣聞古之所謂能以天下讓者審幾於先事謂之至德既勅而庸巽謂之予賢是皆人道之常而未若今日之盛者也我皇太子以仁文之資知勇之德當撥亂反正以續祖宗之統則躬當大難嬰犯霜露而不辭及功成治定既膺歷服之歸則推奉聖兄謙居儲貳而不伐剛明之斷堅於金石而無變素定之誠質諸天地而無疑求仁得仁若處固有樂道忘勢訢然無為此

實帝王之所難能古昔之所未有而卓然特見於前後  
千萬世之內者也臣嘗讀周易而觀於乾龍之象自潛  
至躍時升位異九五天飛中正極矣並進而上庸知退  
夫而仲尼之贊上九曰惟聖人知進退之正言非聖人  
不能及此噫仲尼發此義於千五百年之前而昉見其  
事於聖代宗社生靈萬世無疆之福也於戲盛哉臣等  
幸以文學得備延閣之顧問親逢盛禮爰敢作頌以獻

頌曰

於穆皇儲文武聖明於赫大帝受命輯成天運日行既  
明既健神交意孚曾是修遠帝載龍旂其行遲遲萬民  
俟來皇儲有思載思載瞻于廬于旅式好在原莫敢寧  
處風雨孔時道無游塵肅肅鑾車通宵及晨帝曰勞止  
毋趣行邁會言近止交喜更慨灤陽之京世皇所營我  
母即安次于郊垌垌有豐草雨露既渥差垌於牧繁纓  
濯濯皇儲攸止百靈具扶羣臣受詔奉寶來趨維時范  
金龍光上燭匪舊以新景命攸屬寶來自南追琢有章



卿雲隨之五色景芒有親有尊有友有愛以承武皇聖  
孝斯在古人有言兄弟家邦咨爾臣庶於乎勿忘史臣  
作頌丕昭盛德既壽以昌子孫千億

駐蹕頌

富珠哩

繼天體道敬文仁武大昭孝皇帝即位修明世祖皇帝  
隆平故事以故東平忠憲王之孫司徒忠簡王之子拜  
珠丞相中書至治元年詔若曰忠憲弼我世祖功在社  
稷德在生民其勅詞臣即王所有范陽采地朔南康莊

碑之昭示悠久冬刻銘既完十有二月丞相承詔歲事  
凡犒工勞衆郡邑無所擾饋賀無所受天子遣使牲牢  
之饗秬鬯之禋數異禮隆不一而止父老聚觀或至感  
泣明年春正月帝幸涿州至碑所重瞳凝竚顧瞻有懷  
秋九月幸易州還丙午帳殿碑垣之南駐輦御殿上顧  
丞相若曰汝祖考之績之盛世戴帝室維朕不忘亦惟汝  
之賢有以相朕益懋世德故也丞相頓首謝翌日既旦  
大官饌已上步自帳殿御金椅座碑右丞相稱觴獻萬

歲壽從臣以次進觴天顏和怡甚久乃去丞相諭紳曰  
皇上眷我祖考至此不刻以志則未有以稱汝其銘之  
紳祇栗奉命用敢敘曰

太祖皇帝開創大業忠宣王孔溫窟哇太師魯國忠武  
王穆呼哩佐佑神謨拓定疆宇繼世國王皆著大功忠  
憲王繇國王世胄年十有八嶷然以鉅德大人相世廟  
統六合舉百度底雍熙仁覆天下以垂大猷以迪來哲  
皇上念垂統之艱難守成之不易懷往烈慰股肱聖度

淵深非一介臣能闕萬一敢即所聞見以獻頌曰

赫赫聖明嗣大寶位祖武斯繩昭我皇制慨想先正孰  
佐我家奄奠八紘帝業以華昔我太祖疆理萬國忠宣  
忠武功高輔翼雷雨方屯忠武汎掃華夏之民國王蔭  
葆巍巍世皇幅員既同弼成治隆忠憲之功奕奕世憲  
虎變莫測年未及冠烜著明烈端冕正笏不動色聲俊  
傑在職儒碩在廷何昧不昭何墜不舉何絕不紹何遠  
不睹二十年間再秉鈞軸天極地蟠孰匪亭毒至元始

終中外人心大耄齟齬童統慕至今天日清明終古莫晦  
柱石廟廊宗社永賴相國今誰忠憲脣嗣民之望之忠  
憲是繼克繼克庸滋益光大一以至公熙我天載帝謂  
侍臣丞相之賢家世所因其勅詞垣于忠憲勛大侈以  
丈配永河山以竦見聞涿鹿范陽王有采食山川蒼蒼  
北拱帝極蛟螭盤拏大鼉負之德音不廟神訶護之六  
龍翔翔馭日霄漢再狩郊垌目此銘篆淵鑑昭回駐蹕  
永懷廓清煙霾以霽九垓從臣焜煌千乘萬騎能不激

卷十八  
昂以勵忠義世世夔契生此德門君臣道合豈徒示恩  
忠憲來雲源源裔裔臣頌茲刊不告無既

馮侯去思頌

顧文琛

皇帝即位之明年詔地官攷輿地圖舉天下縣邑民數  
之繁者陞為州置賢守臣以幸百姓於是越之諸暨實  
得今馮侯翼越在漢為會稽郡其民剽輕漢嘗以貴近  
臣為之守猶或不振輒報聞罷自唐以來越為雄藩諸  
暨為劇縣尤號難治侯始至州訪民疾苦知姦猾為民

害由是嚴為之禁里社長有藏匿者同其罪姦猾望風  
引避民賴以安鄉胥舞文虛增稅石民以抑納為苦侯  
洞察其姦令民得自陳訴積年弊欺一旦盡去先是吏  
卒旁午田里無虛日侯至悉禁戢之亦無廢事有以私  
謁莫夜擣於侯者侯輒斥去之邦之士喑喑稱廉侯聞  
笑曰廉士大夫常分也廉恥道喪久矣吾豈詭衆哉吾  
求以不負吾所學耳凡豪強撓法者必痛加摧抑無少  
假借既不逞則羣怨之侯不為動郡政之暇輒引諸生

講習經史州吏環聽之凜凜乎有富而教之之意會行  
省以浙西某路荒田失實及瀕海郡鹽法多弊檄侯往  
問州民數千人遮道請留不得請則相對涕泣如失慈  
父侯奉檄所至弊衣徒步以察微隱其所以詘姦豪而  
伸孱懦者甚於為州嗚呼若馮侯者求之古循吏殆未  
見其比也或曰班固序漢循吏五人而龔黃為之最如  
龔黃者獨不可為侯比乎僕應之曰漢循吏易能也馮  
侯未易能也漢郡地方千里太守秩二千石考最者輒



入為九卿次不失為三輔位尊而權任專故其道易行  
其化易成而其事可勉而至也今自州而上有會府有  
部刺史方伯連率而知州官五品秩不滿五百石制其  
權而撓其政者非一獨馮侯毅然不為利疚不為勢詘  
斬於必行其志然則龔黃為馮侯之所易馮侯為龔黃  
之所難烏可比哉衆皆譁然稱善則相率請為文以頌  
侯德頌曰

葢爾暨陽附庸於越生齒滋衆在今為劇帝披輿圖命

陟而州擇賢守臣得今馮侯侯自西來羸馬敝衣邦人環觀且喜且疑侯始為政循循于于惟姦是屏惟弱是扶罔俾苞苴累我名節爾永雖清我行惟潔堂堂乾坤如侯幾人天寶遺侯惠我邦民邦民懼呼更相告語始疑今信侯我父母昔侯未來骨肉流亡侯既來止爾農爾商帝憫下人病於荐饑水利田功乃懋乃司帝曰咨汝往貳其政侯拜稽首臣翼惟命我民有言侯毋疾驅天子有詔侯不敷徐世無陽秋孰祀侯德百世不隳視

我茲刻

贊

魯齋先生畫像贊

王磐

氣和而志剛外圜而內方隨時屈伸與道翱翔或躬耕  
太行之麓或判事中書之堂布褐蓬茅不為荒涼珪組  
軒冕不為輝光虛舟江湖晴雲卷舒上友千古誰與為  
徒管幼安王彥方元魯山陽道州蓋異世而同符者也

書畫像自警

劉因

所以承先世之統者如此其孤所以當衆人之望者如是其虛嗚呼危乎不有以持之其何以居

王允中真贊

劉因

齒未老鬢胡為而白耶隱然含四海之憂鬢雖衰顏胡為而壯耶凜然橫千仞之秋竹石丹心砥柱中流百折而必東寸折而不柔其履危犯險幾禍一身然視循默苟容貽害當世者不優耶

質齋贊

蕭欽

國子助教祁君子京以質名齋自為記且銘之一時宗工秀人題詠盡其義矣齋人蕭欒掇其遺而為贊曰

上古聖神仰觀俯察旁及鳥獸取象維八書契干戈登降控揭化成之具於焉以茁魏乎煥乎重華位陟文命誕敷懋昭大德視民如傷于湯有光姬情孔思謨訓洋洋經緯三極時維至文世變風移覆其質云世之謂文古所無有游夏言行昭昭可考締章繪句錦心繡口充棟汗牛世用曷取蔽天之明室人之靈繇政迄廣甌斯

以成卓哉祁君矜世之病質以自居求盡其性如彼流  
泉載浚厥源彼華彼實載殖厥根如貴尚白循循勿勿  
立德立言成已成物

晦庵先生畫像贊

吳 澂

理義密微蠶絲牛毛心曾恢廓海闊天高豪傑之才聖  
賢之學景星慶雲泰山喬岳

臨川野老自贊

吳 澂

身形瘦削春林獨鶴眼睛閃爍秋霄一鶚遠絕塵滓大

同寥廓自鳴自和自歌自樂

李秦公畫像贊

程鉅夫

歷觀宰輔久無儒者潛龍羽翼公乃大雅帝曰舊學汝  
遂相予真儒之效此其權輿熙運方開明良起喜如龍  
如雲如魚如水任以天下可謂大臣勞謙得士清靜寧  
民想其風采金玉珪璧賜之畫圖式是百辟豈惟丹青  
盛德形容尚友凌烟黃閣清風

臨川吳先生畫像贊

虞集

業廣而精德周而尊釐析羣言以究斯文章甫玄端書  
冊左右愷悌君子天錫眉壽

西夏相幹公畫像贊

虞集

公姓幹氏其先靈武人從夏主遷興州世掌夏國史公  
諱道沖字宗聖八歲以尚書中童子舉長通五經為蕃  
漢教授譯論語註別作解義二十卷曰論語小義又作  
周易卜筮斷以其國字書之行於國中至今存焉官至  
其國之中書宰相而歿夏人嘗尊孔子為至聖文宣帝



是以畫公象列諸從祀其國郡縣之學率是行之夏亡  
郡縣廢於兵廟學盡壞獨甘州僅存其迹興州有帝廟  
門榜及夏主靈芝歌石刻涼州有殿及廡至元間公之  
曾孫雲南廉訪使道明奉詔使過涼州見殿廡有公從  
祀遺象歔歔流涕不能去求工人摹而藏諸家延祐間  
荆王修廟學盡撤其舊而新之所象亡矣廉訪之孫奎  
章閣典籤伊勒都嘗以禮記舉進士從予成均於閣下  
又為僚焉間來告曰昔故國崇尚文治先中書與有功

焉國中從祀廟學之象僅存於兵火之餘而泯墜於今日不亦悲夫先世至元所摹象固無恙也願有述焉以貽我後之人乃為錄其事而述贊曰

西夏之盛禮事孔子極其尊親以帝廟祀乃有儒臣早究典謨通經同文教其國都遂相其君作服施采顧瞻學宮遺象斯在國廢時遠人鮮克知壞宮改作不聞金絲不忘其親在賢孫子載圖丹青取徵良史

自贊畫像

虞集

邈乎千載之下而謂古今一時也眇乎五尺之軀而謂  
天地一體也廓乎不自知其所知也歛乎未能至其所  
至也俛乎若憂非有傷乎其內也泊乎若休無所待乎其  
外也服今人之服食今人之食同乎今之人聊以順吾  
際也讀古人之書誦古人之詩思夫古之人不知老之  
至也

大象圖贊

虞集

皇帝畫大象圖賜皇太子監察御史前典寶少監臣某

承命裝演而寶藏之翰林直學士臣集再拜稽首而作  
贊曰

有偉馴象至自南域倬革鏤錫路車是服維皇在輿游  
目於式任重持安眊力知德燕閒以思寫之几格天章  
龍文臻妙造極嗟爾微勞尚軫宸臆師武臣能有不察  
識若稽包犧受圖布畫遠取不遺以咨神易擬茲形容  
克配古昔臣用述贊與世作則

橐佗圖贊

虞集

皇武肇迹宛宛龍漠不居其康輯乘為郭有服維佗  
礪肉載嶢毳旃帷房絳輓輦輶輶千里載泉于橐  
黃頭羔裘騎引顧却人習見聞聖獨有作深宮穆清思  
詔勒鈞手著厥初伊勞匪樂公劉績稷于邦式廓裏糧  
啓行致祚八百史臣作雅稽古允若

靜修劉先生畫像贊

歐陽玄

微點之狂而有沂上風雲之樂資由之勇而無北鄙鼓  
瑟之聲於裕皇之仁而見不可留之四皓以世祖之略

而遇不能致之兩生嗚呼麒麟鳳凰固宇內之不常有也然而一見而六典作一出而春秋成則其志不欲遺世而獨往也明矣亦將從周公孔子之後為往聖繼絕學為來世開太平者耶

默庵安先生畫像贊

歐陽玄

寤寐乎明善誠身之書步趨乎格物致知之學闢西三  
鱣未必榮於教授之四世荀陵八龍奚以過於伯仲之  
一壑豈非白茅重而忠信著玄酒醇而嗜慾薄者乎鍾

期伯牙有同世而不相遇者吾故於默庵之神交而益以重容城之先覺也

威如蘇先生畫像贊

歐陽玄

英英紫芝皎皎素絲冥搜遠討默識近思子雲精深季海孝友德人之容君子之守

郎中蘇公畫像贊

歐陽玄

維子寧父為名卿士其心塞淵如古君子既合於古豈諧於時職是正直弗究厥施居家嚶嚶在國諤諤屹如

長松矯如一鶚蚤以謹言屢忤權相晚著惠愛足食邊  
饒剛者必仁仁必有後宜爾有子簡自造秀遺像儼  
然不亡者存九原可作孰敢吏雲

潘雲谷墨贊

李洞


徂徠松雲貯玄谷道人居中抱其獨琅琅空山萬杵熟  
道人曄然開電目松雲化石石化玉崢嶸寶氣星漢燭  
貢之奎章月在櫝龍光淋漓九宇福

李節婦馮靜君贊

王士熙



古之稱節婦人者不特織紵組紃而已良人不夭未亡  
殆存出生氣於寒灰之中死者得安生者已傳其家嗚  
呼馮氏百世猶誇



元文類卷十八

欽定四庫全書

集部

元文類卷十九

二十

詳校官通政使

臣

夢吉

助教臣常循覆勘

總校官庶吉士

臣

朱

鈐

校對官中書

臣

嵇承志

膳錄監生

臣

蔣錦城

欽定四庫全書

元文類卷十九

元 蘓天爵 編

碑文

國子學先聖廟碑

程鉅夫

皇慶二年春皇帝若曰我元膺百聖之統建萬民之極  
誕受厥命作之君師世祖混一區宇亟修文教成宗建  
廟學武宗追尊孔子所以崇化育材也朕纂丕圖監前  
人成憲期底於治可樹碑於廟詞臣文之臣鉅夫拜手

稽首奉詔言曰臣聞遠古之初惟民生厚風氣漸靡聖人憂之越有庠序學校之制天下之治胥此焉出中統二年以儒臣許衡為國子祭酒選朝臣子弟克弟子員至元四年作都城畫地宮城之東為廟學基廿四年備置監學宮元貞元年詔立先聖廟久未集大德三年春丞相臣哈喇哈遜塔喇海大懼無以祇德意乃身任之飭五材鳩衆工責成工部郎中臣賈馴心計指授晨夕匪懈工師用勸十年秋廟成謀樹國子學御史臺臣復

以為請制可至大元年冬學成廟度地頃之半殿四阿  
崇尺六十有五廣倍之深視崇之尺加十焉配享有位  
從祀有列重門修廊齋廬庖庫為楹四百七十有八學  
在廟西地遜於廟者十之二中國子監東西六館自堂  
徂門環列鱗比通教養之區為間百六十有七制加孔  
子大成之號祠以太牢贊釋奠雅樂江南復戶四十隸  
之春秋二祀先期必命大臣攝事皇帝御極陞先儒周  
敦頤程顥程頤司馬光張載邵雍朱熹張栻呂祖謙許

衡從祀廣弟子員三百進庶民子弟之俊秀相觀而善  
業精行成者歲舉從政又詔天下三歲一大比興賢能  
於是崇宇陞陸陳器服冕聖師巍然如在其上教有業  
息有居親師樂友諸生各安其學咸曰大哉天子之仁  
至哉相臣之賢工曹之勤其知政治之本原矣臣竊謂  
天地至神非風雨霜露罔成其功斯道至大非聖君賢  
相罔致其化人性至善非詩書禮樂罔就其器列聖相  
承謂天下可以武定不可以武治所以尊夫子建辟雍

復科舉誠欲人人被服儒行為天下國家用耳然則黎民於變時雍顧不在茲乎於戲隆哉臣鉅夫謹拜手稽首而獻頌曰

皇元受命誕惟作京以撫萬邦既訖武功載修文教登其俊良於穆宣聖垂範罔極首尊而彰曰爾曹子弟典於學曷風四方學以聚之廩之餼之日就月將大德嗣服迺建孔廟迺經辟雍考制程財審時相宜適成厥功辟雍洋洋冕服皇皇羣士景從聖道既明渙號既加我



皇御天執道之中軌物牖民翼翼乾乾帝學益弘庶政  
惟和我化用宣躋祀儒師賓興羣材丕紹厥先相古盛  
時訏謨遠猷罔不由賢天錫皇祖神聖文武以有萬國  
威何不加令何不行何求不獲惟學是務惟材是育下  
民允迪越厥左右咸有一德以匡乃辟維帝時憲惟臣  
克念濟濟茂碩禮明樂備永作神主播頌無斁

曲阜孔子廟碑

閻復

聖上嗣服之初述祖考之成訓興學養士嚴祀先聖自

曲阜始制詔若曰孔子之道垂憲萬世有國家者所當  
崇奉中外聞之咸曰大哉王言拭目太平文明之治粵  
明年元貞改元先聖五十三代孫密州尹治入朝璽書  
錫命中議大夫襲封衍聖公月俸百千秩視四品孔氏  
世爵弗傳者久至是乃復申命有司制考辟雍作廟於  
京師由是四方嚮風崇建廟學惟恐居後闕里祠宇燬  
於金季之亂閣號奎文若大中門闥存者無幾右轄嚴  
公忠齊保魯嘗假清臺頒厯錢佐營繕之費歲戊申始

復鄆國後寢以寓先聖顏孟十哲像至元丁卯衍聖公治尹曲阜主祀事將圖起廢奎文杏壇齋廳黌舍即其舊而新之禮殿則未遑也國初封建宗室畫濟兗單三州為魯國大長公主駙馬濟寧王分地置濟寧總管府屬縣十六曲阜其一也濟寧守臣按檀不華恭承詔旨會府尹僚佐鄉長者謀曰方今聖天子守成尚文此鄉威化之源禮義之所從出為守臣者敢不對揚休命以廟役為任首出泉幣萬緡衆翕然助之傭工顧力市木

於河輦石於山掄材於野采棟樑桷楹礎之屬悉具又得泗水渠堰積石數百石望稱是露階鉗砌咸足用焉郡政之暇躬為督視甄陶鍛冶丹雘髹漆以至工師廩積各有司存經始於大德二年之春屬歲祲中止歲事於五年之秋不期月而告成殿壘重簷亢以層基繚以修廊大成有門七十二賢有廡泗沂二公有位黼座既遷更塑鄆國像於後寢締構堅貞規模壯麗大小以楹計者百二十有六貲用以緡計者十萬有畸落成之旦

遠近助祭者衣冠輻湊衆庶瞻顙千禩祖庭頓還舊觀  
於是衍聖公治遣其子曲阜令思誠奉表以聞且以廟  
碑為請會選胄子入學擢思誠國子監丞特敕中書賜  
田五千畝以供崇盛復戶二十八以應洒掃仍下翰林  
書其事於石臣復承命踴躍既述興造始末竊惟聖人  
之道與天地並聖人之祀與天地無極堯舜湯文之君  
不作而道在洙泗立言垂教推明堯舜湯文致治之由  
模範百王仁及天下後世願治之主莫不宗之廟貌相

望遠乎四海聖人之道固無係於祀禮之隆殺夫尊其道而修其祀蓋治古之恒規王政之所先也洪惟聖元神武造邦天兵傳汴戎事方殷不忘存敬先聖之祀詔求五十一代孫衍聖公元措歸魯裒集奉常禮樂於兵燼之餘燕翼之謀肇於此矣世祖聖德神功文武皇帝仁霑義洽九域混同文物煥然可觀內立國學外置郡邑學官而於先聖之後尤所注意遴選師儒訓迪作成需賢以嗣封爵茲志未究皇上纘而成之故自紹膺景

命以敦化厲俗為先務至於博施濟衆敷文來遠哀矜  
庶獄惠鮮鰥寡由天縱之聖見於設施皆堯舜湯武之  
舉揆諸聖經之言若合符契用能張皇教本光昭先業  
以致魯國臣民思樂泮水如附靈臺子來之衆至矣哉  
觀文化下必世後仁之效豈特震曜一時寔宗社無疆  
之福也銘曰

道之太原實出於天天何言哉乃以聖傳傳道維何唐  
虞三代儀範百王萬世永賴聖人之功與天比隆聖人

之祀垂之無窮皇元肇基撥亂右武天兵趨汴周禮在  
魯烝哉世皇載整乾綱始定終綏遂臣萬方肅肅魯庭  
嗣封有典德音孔昭聖謨丕顯王者之作必世後仁繼  
序不忘成於孝孫適觀厥成是訓是則思樂泮水作廟  
翼翼如矢斯棘如翬斯飛邊豆靜嘉陟降有儀祀事孔  
嚴世爵以延汎掃有戶綵盛有田聖政聿新希蹤治古  
僉曰皇明登三咸五泰山巖巖聖祀綿綿與國無疆於  
萬斯年



襄陽廟學碑

姚燧

聖元為制凡士其名而儒其服不祿之民而殊其籍惟  
責田租商征自外身庸戶調皆復之無有所與者將百  
年於此矣世祖詔即闕里聚孔顏孟三族置官而教之  
以俟其成德達材者垂三紀焉是皆無聞歷古而獨見  
之今者也陛下恢前皇之遠猷舉厥未修之典封衍聖  
公屢下明詔還正貢莊學田俾完廟養老資廩師生其  
於世聖人之胄學聖人之徒覆毓漸濡德澤至矣府州

縣邑為之牧守今長者率以作新廟學為政務先而恐風行聖化之後也襄陽宋之鄆城也金社既墟嘗歸吾元由於忽棄不成故宋竊築為荆北門殆四十年世祖徵兵天下不忍徼利一旦以鬪吾民包峴漢而城之視猶圈虎待其自斃五年迺下則其受大兵也為最久城門闢矣廟學前大閫帥武臣因陋就簡而為之不稱神居勢宜改為田之在郊籍既失存民亦廢耕主吏去之無有知其所在所不敢視江南他州之有夙儲者其施力

又若甚艱此前政所以苟於其事者惟總管陳衍經度之已而受更今總管陳義謀之吏民曰明詔如是吾方表田募民覲獲何時明日使是學媿德他州則二千石為不職且受譴矣不衆為之就緒無日吏此者割若俸戶此者捐若財應者謹然辭出若一帥守兵家亦勸赴功猶不足用取餘公帑治之二年聖哲中殿賢儒傍序門堂齋庖楹礎林立朔望春秋奠薦講肄籩豆鐘鼓有踐與節人之戾止新視易聽起所墮習而祇畏矣燧曾

過矣拜其下庭猶有可憾焉者自唐開元配食顏子拔  
曾子於諸子以足十哲前宋則躋孟子與顏氏並雖金  
百年未之或改後宋則益以曾子子思進子張於曾子  
之舊故江之南位十哲上亞聖人者四焉宋平北方  
學者安顏孟而異曾思浙憲首請黜之當國之臣不然  
之也其後一侯為憲河南是時襄陽未入山南猶其所  
蒞也不請而遂黜之由是是廟配止顏孟自今以觀顏  
曾之於夫子同見而知伯魚前死則子思亦見而知者

惟孟子後百有餘歲為聞而知子思學曾子孟子學子思而得其道統之傳則曾思之功果不優於孟氏乎顏氏前死有聖人者存未嘗為書質之於經事十九見贊夫子者纔一問仁與為邦二焉一以修己一以治人他皆見稱於夫子與不待為問而自謂之者也曾子述孝經大學子思作中庸孟子則自著七篇之書學者賴之至今為書三子二子獨見黜是外其師而弟子是尊於聞而知者仍祀不變而顧後所見而知者焉皆不知為

何說也或曰子記汴學已譏立顏路曾皙伯魚於序而坐三子堂上今何云然燧曰嚮所疑者以崇子而抑父弗安順於倫理非曰可併去之也今江南已配享者可不講而黜之則江之北有有功曾思者可不請而配享乎燧故嘗曰人臣有見列而上之則可若制度考文之事天子司之以幸國家遑於稽古之事雖天下學禮之臣羣然議之必得所當義者而後可也俟讐石求銘奉議大夫山南江北道肅政廉訪副使馬公昫分刺是郡

亦以俟嘗勤心宜若可言燧曰嗚呼是豈可易為哉孟子稱智足以知聖人者宰我子貢有若子貢有若以為自生民以來未有宰我以為賢堯舜遠猶未曉言聖人之所以然孔子語堯曰蕩蕩乎民無能名焉則遠堯舜者益難名矣然自孔子沒訖漢之世將八百年廟焉而不碑其見之金石者孝桓元嘉許魯相瑛置百石史領禮器與孝靈元興魯相晨秦依社稷出穀王家供禋祀二詔魏曹植始碑之唐則作廟一州必碑最盛以衆

就其善言者韓愈氏處州柳宗元柳州道州曰自天子  
至於郡邑通祀遍天下惟社稷與孔子又曰仲尼之道  
與王化遠邇二帝三王無以侔大不敢一言以贊其道  
無他蓋聖人之道天也善言者繪工也於山水鳥獸草  
木之為物與人執事或可圖而肖之以語繪天設色而  
得其髣髴萬一者古今人無能為者也故惟著其始媮  
而今完者以告夫後之人銘曰維襄形勢始終一地視  
時屯亨而為險易昔焉畫守負而江山動天下兵五稔



悖頑時匪無學士日介胄以扞大刑違事俎豆皇輿既  
邈壇南海涯顧為土中襟帶安施猶為名城於漢之域  
惟廟弊軋不稱瞻式帝奮文教誕告優優于學須才如  
穫仰稷是邦承流其陳兩侯衍也經畫義逮成績桓桓  
新宮實教所基嗟哉襄士挑達何為聖人遺言具在方  
冊口誦心維奚異親炙朝趨斯庭夕休斯廬亦奚以間  
闕里即居行見接武賓興成德作之君師實帝之力刻  
詩麗牲用示無極

大興府學孔子廟碑

馬祖常

昔我太祖皇帝受命造邦金人孫于汴太祖即以全燕  
開大藩府制臨中夏維時已有定都之志矣故太宗皇  
帝首詔國子通華言乃俾貴臣子弟十八人先入就學  
城新創於兵學官攝於老氏之徒迨世祖皇帝教命下  
始正儒師復學官廟事孔子歸墻垣四侵地勒石具文  
作新士子至元二十四年既城今都立國子學位於國  
左又因故廟為京學京師雜五方俗尹治日不給廟之

墻屋弊壞將壓以毀講席之堂粗完泰定三年今大尹曹侯上視廟貌祠位皆不如制割稍入為寮窠倡然後大家富人合貲以聚財者有焉釋子方士分食以庀徒者有焉施施于于咸樂相成延兩廡五十有二楹締構塗飾工良物辨象從祀諸賢百有五人妥靈惟肖威儀有容又懇請於朝得廩餼弟子員百人受學於師復其身不勞以事於是天下首善之教興焉廟肇自唐咸通中至遼金燕為都邑故嘗用天子學制選舉升造與南國

角立亦一時之盛也太宗皇帝當雲雷經綸之世聖訓  
諄切以德賞喻父師以禮楚懲子弟飢焉粟肉渴焉酒  
醴力焉僕使恩義甚備其養賢勸善之誠固已高出於  
百王之上矣世祖皇帝立極作則人文昭明登用儒臣  
躬親講學故當時勲賢之裔以及宿衛之臣罔不以揖  
讓俎豆之為懿顯蒙昏庸之為耻也而三代國學黨序  
遂庠家塾之等秩然羅列於上下才學經術用世之士  
踵武而出暨仁宗皇帝賓興大比四方舉進士凡登賢

書策名禮部者京師屢倍於外郡非列聖仁涵義揉百  
年之禮樂文物推而致之歟燕自虞夏為武衛之服召  
公之化尚矣昭王築臺以徠賢士鄒衍樂毅劇辛至有  
稱於世韓嬰以詩易為一家師孔穎達博綜五經卓然  
庶幾醇儒今多士游歌在庭樞衣在廟將見魯鄒之美  
矣若嬰穎達宜所不道矧衍毅辛之徒哉夫儒者之學  
詩書六藝之文以至施天下之道無有二也後世教不  
明家異人殊各溺於所習以相詆訾由上之教無以一

之嗟夫古者小學大學之師弟子之傳皆本於道德仁義之實著於詩書六藝之文非有教有授則不敢以傳也傳焉而龐雜不經則上有刑也是故風淳而氣同由上之教有以一之也而王國多士逢文明之會肄業有學學有師春秋祀其先聖先師者又有廟有位入有食以處出有貴於衆所以報稱列聖教化之德而應賢侯承宣之志者必冠而起矣提舉學事崔居中教授賈良弼正張禎祿司視以狀請曰廟之事成前尹瑪蘓庫實

能治之今尹曹偉實能終之經歷王孝祖薛讓警巡監  
院烏德美使李權且能考工於下也余既為言正充邸  
沂鄒四公配食東鄉位其來請遂為銘詩不辭詩曰

皇元有赫奄受大國于月之朏于日之域京邑翼翼莫  
不來極予誕敷文德新都冇嵯辟雍我我璆弁之瑳濟  
爾象犧鈞爾弦歌新宮則邵舊廟如之何皇帝在御百  
度咸樂海輪維柁河浮厥栢是尋是斲虞庠嶽嶽式光  
我上國玄聖儀儀玄紃龍衣衎我先師既右享之采芹

于池薦此明犧用介我蕃釐蕃釐伊何彼美多士克明  
克類克諒厥事以登膺仕以媚於天子有鏗華鐘路鼓  
逢逢言燕于公有翼有顒多士既同天府是庸維曹侯  
之功曹侯閭閭迺承迺宣御劇迺專虞庠連連王士安  
安祇國維賢天子萬年

光州孔子新廟碑

馬祖常

光州既新作孔子廟乃以圖來徵文於州人馬祖常曰  
爾先子為政於此州州有學以教人有田以養士有廟



以祀先聖先師矣今久圯不治廟四出無垣登降無階  
肖象之設五采之服不彰妥靈之位不嚴配侑之序不  
飾室屋構櫨周廡重門及籩豆禮器之類一切弊舊取  
其假備歲春秋釋奠宮及屬師及弟子致齋無次某等  
一二人辱守茲土割其稍入合民之錢粟筏木陶瓦木  
材陶良以錢庀工以粟傭力丹漆黝堊鍤錮施色之物  
皆集作於天歷二年七月九日成於至順元年八月十  
有八日凡廟位象設稱乎南面而為王者之居昔之不

治者今皆治矣昔之無有者今皆有矣爾先子為政於  
此州爾又以文名於時爾宜為文告來者庶謹之而毋  
毀也祖常三為典禮之官習於先王之禮而學於聖人  
之徒陳跡往轍不敢煩州人之聽獨以我朝有道之世  
告吾州人始憲宗皇帝都和寧遣國子二十人就學今  
都之南城孔子廟旁旨意訓誨刻載廟中世祖皇帝潛  
王邸召學士王鶚因幄中設主陳俎豆觀祭孔子儀武  
宗皇帝詔天下若曰世嘗知尊孔子矣而皆未至也其

進封至聖文宣王孔子為大成至聖文宣王今皇帝正  
位制若曰孔子大聖推本父母未極褒崇父叔梁紇可  
封啟聖王母顏氏可封啟聖王夫人命以璽書告闕里  
廟庭猗歟盛哉夫天下既富而教興焉興教必於學學  
必有所師師莫若聖聖莫若孔子則廟而事之者學者  
宜莫先焉且既富而教雖三王之治未有不富而能教  
者吾州介江淮之交生殖甚寡然少長安於樸俗衣服  
飲食給於田蠶弋釣之力工商給於粗完男女婚嫁養

生送死質而有節其人已幾於淳厚故易富而易教弗如他州之人必待厚藏而後富近刑而後教也是以見其州大夫賢欲有所興起於善而又應之速也如此詎天下以難治者豈君子哉國家以文化成四海考郡縣之績當以吾州為首焉茲序其實而又繫之以詩俾州人誦新廟之成而不忘州大夫之德也詩曰

於穆聖師降我新廟几筵維飾象設維肖四瞻周廟載基載築雅雅鱗鱗靈御之肅靈御之肅衣裳我人俾不

為羣而即於倫埏埴萬類同仁於天匪言莫宣匪文莫  
傳六藝百家咸質於經我維受之日化於成大帝在位  
翕以敷施考妣啟聖而追王之四海作則文明式昭我  
州易教作廟維喬梗枏梓栢弗雕而斲陶瓦髹漆施色  
丹渥麗牲在門春秋蠲吉官屬師徒端弁以入其容鏘  
鏘其神洋洋牖茲顓蒙闔而日章淮嶽諸谷會流為潢  
南薄其鄂州名為光光在百城瘠土寡殖維人易教衣  
食耕織則既衣食又學為士學士有師先聖是祠州侯

德勸我民豈忘之

真定路先聖廟碑

富珠哩那

初鎮州置真定路以中山冀晉趙深蠡府一州五土地  
人民奉我睿宗仁聖景襄皇帝顯懿莊聖皇后湯沐首  
務立學養士當是時也世祖聖德神功文武皇帝淵潛  
朔庭聞鎮之學緩未即叙龍集丁未勅有司勿怠其事  
於是以金粟岡廟址崇殿廡闢黉舍太原元好問有記  
越十有四年庚申世皇即祚都燕統一八表置憲肅郡

府鎮憲為諸道之冠庠序闕略必憲人府人胥議興治至元暨今雖屢加葺猶有未備至順辛未憲暨府議倡集楮幣三萬市物傭工募役自殿之廡自廡之門新其屋楹三十有二棟宇軒楯拱挾環合左右翔峙作杏壇於殿之北神厨於廟之東自廟徂學門垣柱桓循序森立瓦墁締築堅麗於舊先是府尹瑪蘓庫已基未構而去政人遷易者十餘年尹張猛台倅和則平治中和允升繼至憲使托歡提其綱賓佐韓復理其目始克有濟

其年夏告成壬申春府遣吏李明善介徵士瞻思狀來  
請志其績翀嘗貳憲燕南義不容讓稽宋蔡京遷學陸  
佃記略曰真定雖塞北有江南之勝江南豪傑特起如  
臨川王公與孟軻相上下真定初未有聞噫是何言之  
怪也真定者冀州東垣堯舊封也昔帝堯以帝嚳子侯  
恒山之唐自唐侯即天子位徙山之西號陶唐氏太行  
東西境數千里皆帝之圻真定固神明之宅也孔子經  
法於易則邇伏羲以本無言書則始唐虞以道政事詩



則采殷周以正性情春秋則黜五霸以嚴名分禮樂升降以鑑窪窪天人之道至矣迺曰惟天為大惟堯則之唐韓愈謂堯以道傳舜禹湯文武周公孔子孟軻蓋孔氏立教如帝典微言如三謨帝堯孔子位不同而同聖王安石背道迷經蒙君誤國京師傾黨滋熾世益大壞河南程氏兄弟承先聖之緒掇之終賴其言道不墜地建安朱氏師則兩程褻輯遺言貫通折衷以悟百世先正許文正公見其書神感明會相我世皇同符堯舜世

道人心翕然大正洙泗淵源日月昭朗今神聖繼興世  
日趨治鎮股肱郡也帝堯之思在焉朝廷之化先焉崇  
事先聖所以教也鎮士知所鄉往下學上達尊經慎藝  
何德不進何業不修何邪不鑑何古不及憲牧之輔治  
教縉紳之報君父於是乎在迺賦詩以慰鎮人士曰

太行之山潯池之水孰古與美陶唐之里潯池之潯太  
行之所孰今與伍皇祖之土恒山嶙嶙潯水汙汙昊天  
生民思堯之仁潯水湯湯恒山蒼蒼帝堯相望於赫世

皇始鎮之府時未忘武維士與女澤沐時雨龍德出潛  
萬方既瞻春熙秋嚴自北而南皇風斯扇時雍於變視  
彼侯甸恒鎮之先大殿周廡先聖之宇久未今覩誰敢  
予侮有廟有庭有戶有扁肅肅其凝昭昭其靈新是鎮  
學式對恒嶽惟士也確順我先覺求門於墻求室於堂  
伊洛考亭使我不盲惟聖之玄惟王之素園冠方履天  
地之度侃侃閭閻天天申申如目之眴如躬之親既儼  
既翼臨汝明德以賓皇國方州是則鎮人聚喜歸功憲

紀憲人曰止其誰敢爾顯望神京稽首奉揚配天無疆  
天子之光

元文類卷十九

其年夏告成壬申春府遣吏李明善介徵士瞻思狀來  
請志其績州嘗貳憲燕南義不容讓稽宋蔡京遷學陸  
佃記略曰真定雖塞北有江南之勝江南豪傑特起如  
臨川王公與孟軻相上下真定初未有聞噫是何言之  
怪也真定者冀州東垣堯舊封也昔帝堯以帝嚳子侯  
恒山之唐自唐侯即天子位徙山之西號陶唐氏太行  
東西境數千里皆帝之圻真定固神明之宅也孔子經  
法於易則遯伏羲以本無言書則始唐虞以道政事詩

則采殷周以正性情春秋則黜五霸以嚴名分禮樂升降以鑑窪窪天之道至矣迺曰惟天為大惟堯則之唐韓愈謂堯以道傳舜禹湯文武周公孔子孟軻蓋孔氏立教如帝典微言如三謨帝堯孔子位不同而同聖王安石背道迷經蒙君誤國京佃傾黨滋熾世益大壞河南程氏兄弟承先聖之緒掾之終賴其言道不墜地建安朱氏師則兩程褻輯遺言貫通折衷以悟百世先正許文正公見其書神感明會相我世皇同符堯舜世

道人心翕然大正洙泗淵源日月昭朗今神聖繼興世  
日趨治鎮股肱郡也帝堯之思在焉朝廷之化先焉崇  
事先聖所以教也鎮士知所鄉往下學上達尊經慎藝  
何德不進何業不修何邪不鑑何古不及憲牧之輔治  
教縉紳之報君父於是乎在迺賦詩以慰鎮人士曰

太行之山潞池之水孰古與美陶唐之里潞池之潄太  
行之所孰今與伍皇祖之土恒山嶙嶙潞水沄沄昊天  
生民思堯之仁潞水湯湯恒山蒼蒼帝堯相望於赫世



皇始鎮之府時未忘武維士與女澤沐時雨龍德出潛  
萬方既瞻春熙秋嚴自北而南皇風斯扇時雍於變視  
彼侯甸恒鎮之先大殿周廡先聖之宇久未今覩誰敢  
予侮有廟有庭有戶有扁肅肅其凝昭昭其靈新是鎮  
學式對恒嶽惟士也確順我先覺求門於墻求室於堂  
伊洛考亭使我不盲惟聖之玄惟王之素園冠方履天  
地之度侃侃閭閻天天申申如目之眴如躬之親既儼  
既翼臨汝明德以賓皇國方州是則鎮人聚喜歸功憲

紀憲人曰止其誰敢爾顯望神京稽首奉揚配天無彊  
天子之光

元文類卷十九